

啓 批勿煩○北兵使李思晟狀請移咨北京每年開市如義州中江之例兩國接界之地別定空閑一處各自交易供饋則以乾物給之禮段則依定式施行廟堂覆啓以移咨體重 不許○壬午諫院申前啓 批勿煩○癸未夜二更乾方有氣如火光○上引見大臣備堂右議政洪致中言蔚山府靖嬪房漁箭折受處頃因慶尚監司狀啓廟堂覆奏請罷而自 上有與兵營分半收稅之教矣曾在 肅廟朝故相臣閔鎮長為戶判時陳達榻前諸宮家漁場折受永為革罷 先朝定式固當遵守而况分半收稅終涉苟且兩處收稅民弊尤甚俯察民情特命革罷則有光 聖德矣右叅贊沈宅賢亦以分稅之際必有爭端為達 上曰頃者關西折受因一守令之辭狀許其革罷况此事大臣有言予豈不從乎其令還屬本道時李思永妻訟其子天紀之冤 上詢問大臣諸臣致中曰詢問之下何敢不盡所懷乎天紀之偏被酷禍雖甚可矜第此輩果有締結虎賊交通宦寺之事則不可與無故冤死之人並許復官更考文案果無是事則當議蕩滌或有疑端則宜有處分矣禮曹叅判黃龜河曰昨年閔鎮遠以天紀復官事陳達則自 上持難勿令舉論臣意謂雖伸雪其逆名復官之不許 聖意有所區別而然也今若許復則沈尚吉之弟亦有為其兄上